



Komunikado di Prensa --- Komishon di Evaluashon Struktura Estatal Hulanda Karibense---  
12 di òktober 2015

## **Sinku aña konektá: Boneiru, Sint Eustatius, Saba i Hulanda Europeo**

Na Boneiru, Sint Eustatius i Saba hopi a kambia for di 10 di òktober 2010. Tantu e islanan mes komo gobièrnu di Reino a invertí hopi tempu, sèn i energia pa logra pa e transishon ta un éksito. Na 2010 optimismo tabata reina, e ekspektativanan tabata haltu. Den e añanan tras di lomba a realisá hopi trabou. Den korto tempu a prepará i ehekutá hopi kambio. E resultado di e esfuersonan ta variá.

Klaramente a logra kambionan positivo, manera por ehèmpel den kuido i enseñansa. E konklushon di e komishon ta ku partikularmente e resultado tabata un eksito riba tereno kaminda e plannan tabata ambisioso i e palabrashonnan tabata konkreto. Hopi ta laga di deseá ainda. Apesar di e intenshon pa minimalisá introdukshon di lei i reglanan nobo, den práktika hopi a kambia. Sierto kambionan ta kousa malkontentu. Habitantenan ta sinti ku a enbolbínan muchu tiki den e kambionan i hopi biaha no a tene suficiente konsiderashon ku e sirkunstansianan partikular di e islanan. E problema di pobresa a oumentá, entre otro dor di e bahada den forsa di kompra i e nivel abou di benefisionan sosial. Tambe tin retraso den mantenshon di infrastruktura físiko.

E komishon ta yega na e konklushon ku e resultatonan desapuntante kual ta ser kousá dor di vários faktor. E palabrashonnan hasí no ta semper kla i ta splika esakinan di vários manera. E ehèmpel ku hopi hende ta papia di dje ta e palabrashon riba e tema di 'un nivel di fasilidatnan ku ta aseptabel den Hulanda'. E diferensia den idioma, e grandura i e kultura ta hasi koperashon entre Boneiru, Sint Eustatius, Saba i Gobièrnu di Reino difísil. E aktividatnan di gobièrnu di Reino ta fragmentá i e konosementu riba situashonnan spesífiko na Boneiru, Sint Eustatius i Saba hopi biaha ta limitá. Banda di esei gobièrnu lokal no tin e kalidat nesario ainda.

No ta tur desaroyo na Boneiru, Sint Eustatius i Saba for di 10 di òktober 2010 ta konektá ku kambionan estatal. Meskos ku e parti Oropeo di Hulanda, e islanan tambe a ser afektá pa e krisis ekonómiko i finansiero mundial. Banda di esei e desaroyo ekonómiko ta limitá. Boneiru, Sint Eustatius, Saba i e parti Oropeo di Hulanda falta mester akshon komúnku ta ofresé perspektiva ekonómiko.

Na e momentunan aki na e islanan ta reina un amplio sintimentu di desapunto ku a sigui krese for di 2010. No tur e espektativanan haltu ku hendenan tabatin na 10-10-10 a bira realidat. Den gran parti esaki tin relashon ku e nivel di prosperidat; e standard di biba, pa hopi hende, asta pa esunnan ku tin trabou, a baha for di 2010.

E balansa despues di 5 aña ainda no ta positivo. Sinku aña ta kòrtiku. Ta muchu tempran pa duna un opinion final. E proseso di transishon ainda ta den pleno marcha. E komishon ta ekspresá e deseo pa e resultatonan di e evaluashon forma e base pa un impulso pa trese e metanan original di e kambionan estatal mas serka. Esaki ta eksigí pa Boneiru, Sint Eustatius, Saba i Hulanda Europeo, den diálogo ku habitantenan, yega na palabrashonnan konhunto konkreto ku ta na interes di habitantenan di Boneiru, Sint Eustatius i Saba.

### **Informashon adishonal**

For di 10 di òktober 2010 e islanan Boneiru, Sint Eustatius i Saba kada unu tin un relashon direkto ku Hulanda. A palabrá ku despues di sinku aña lo evaluá kon ehekushon di e struktura estatal nobo a resultá. E komishon a wak ehekushon di e leinan, e ehekushon di e struktura gubernamental nobo i e konsekuensianan pa e komunidat. A ehekutá e evaluashon riba enkargo di Kolegionan Ehekutivo di e Entidatnan Públiko di Boneiru, Sint Eustatius, Saba i e Minister di Asuntunan Interno i Relashonnan den Reino.

---

### **Nota pa redakshon, no pa publikashon**

Si bo tin pregunta tokante di e rapòrt òf tin petishon pa entrevista ku e komishon, por tuma kontakto ku Hendrieneke Bolhaar, [communicatie@evaluatiecn.nl](mailto:communicatie@evaluatiecn.nl), +31(0)6 53 663 621).